

Na temelju člana 16. Zakona o upravi („Službeni glasnik Bosne i Hercegovine“, broj 32/02 i 102/09), člana 49. alineja 7. Okvirnog zakona o visokom obrazovanju u Bosni i Hercegovini („Službeni glasnik Bosne i Hercegovine“, broj 59/07 i 59/09), člana 7. i člana 12. Statuta Agencije za razvoj visokog obrazovanja i osiguranje kvaliteta („Službeni glasnik Bosne i Hercegovine, broj 86/09), direktor Agencije za razvoj visokog obrazovanja i osiguranje kvaliteta, uz saglasnost Upravnog odbora sa 14. sjednice održane 24.10.2011. godine, **d o n o s i**

**INSTRUKCIJU O NAČINU OCJENJIVANJA USKLAĐENOSTI RJEŠENJA O  
AKREDITACIJI S MINIMALNIM STANDARDIMA IZ PODRUČJA VISOKOG  
OBRAZOVANJA I KRITERIJIMA ZA AKREDITACIJU VISOKOŠKOLSKIH  
USTANOVA U BOSNI I HERCEGOVINI**

**Član 1.  
(Predmet)**

Ovom Instrukcijom se propisuje način ocjenjivanja usklađenosti rješenja o akreditaciji visokoškolskih ustanova, odnosno studijskih programa koje donose nadležna obrazovna tijela određena kantonalnim zakonima, zakonom Republike Srpske i zakonom Brčko distrikta BiH (u daljem tekstu: nadležna obrazovna tijela) s minimalnim standardima iz područja visokog obrazovanja i kriterijima za akreditaciju visokoškolskih ustanova u Bosni i Hercegovini.

**Član 2.  
(Komisija za ocjenjivanje usklađenosti rješenja)**

(1) Ocjenjivanje usklađenosti rješenja iz člana 1. ove Instrukcije vrši Komisija za ocjenjivanje usklađenosti rješenja o akreditaciji visokoškolske ustanove, odnosno studijskog programa (u daljnjem tekstu: Komisija), koje po prijemu rješenja o akreditaciji, imenuje direktor Agencije iz reda državnih službenika u Agenciji.

(2) Komisija se sastoji od tri člana i o svom radu vodi zapisnik.

**Član 3.  
(Zadatak Komisije)**

Zadatak Komisije je da, na temelju uporednog pregleda činjeničnog stanja na temelju kojeg je doneseno rješenje o akreditaciji, Izvještaja Komisije stručnjaka iz člana 49. Zakona, odnosno nalaza, mišljenja i preporuke Komisije stručnjaka, i preporuke Agencije o akreditaciji visokoškolske ustanove, odnosno studijskog programa utvrdi je li rješenje o akreditaciji

visokoškolske ustanove, odnosno studijskog programa usklađeno s minimalnim standardima u području visokog obrazovanja i kriterijima za akreditaciju visokoškolskih ustanova.

#### **Član 4. (Prijedlog Komisije)**

(1) U slučaju kad Komisija utvrdi da je rješenje o akreditaciji visokoškolske ustanove, odnosno studijskog programa usklađeno s minimalnim standardima u području visokog obrazovanja i kriterijima za akreditaciju visokoškolskih ustanova, sačiniće o tome Zapisnik s prijedlogom da se izvrši upis visokoškolske ustanove, odnosno studijskog programa u Registar akreditiranih visokoškolskih ustanova u Bosni i Hercegovini (u daljnjem tekstu: Registar).

(2) Ukoliko Komisija utvrdi da rješenje o akreditaciji visokoškolske ustanove, odnosno studijskog programa, nije usklađeno s minimalnim standardima u području visokog obrazovanja i kriterijima za akreditaciju visokoškolskih ustanova, a nadležno obrazovno tijelo koje je donijelo rješenje o akreditaciji, nije odredilo mjere i rok za otklanjanje nedostataka, Komisija će u svom Zapisniku, koji dostavlja Agenciji, dati prijedlog preporuke o mjerama za usklađivanje rješenja o akreditaciji s minimalnim standardima u području visokog obrazovanja i kriterijima za akreditaciju visokoškolskih ustanova.

#### **Član 5. (Preporuka Agencije)**

(1) Na temelju Zapisnika i prijedloga Komisije iz člana 4. stav (2) ove Instrukcije, Agencija daje preporuku Upravnom odboru o poduzimanju određenih mjera za usklađivanje rješenja o akreditaciji s minimalnim standardima u području visokog obrazovanja i kriterijima za akreditaciju visokoškolskih ustanova.

(2) Prije dostavljanja Preporuke Upravnom odboru, Agencija Preporuku iz stava (1) ovog člana dostavlja nadležnom tijelu, koje je donijelo rješenje o akreditaciji, na izjašnjenje.

(3) Izjašnjenje o Preporuci Agencije, nadležno tijelo dostavlja Agenciji u roku od 15 dana od dana prijema Preporuke.

#### **Član 6. (Postupanje Agencije)**

(1) Ukoliko nadležno tijelo koje je donijelo rješenje o akreditaciji visokoškolske ustanove, odnosno studijskog programa uz dostavljanje Izjašnjenja o Preporuci Agencije, obavijesti Agenciju da je poduzelo određene mjere za usklađivanje rješenja o akreditaciji s minimalnim standardima u području visokog obrazovanja i kriterijima za akreditaciju visokoškolskih

ustanova, o čemu dostavlja i izmijenjeno rješenje o akreditaciji visokoškolske ustanove, odnosno studijskog programa, Agencija će zatražiti od Komisije iz člana 2. ove Instrukcije da utvrdi da li su nedostaci otklonjeni i može li se izvršiti upis u Registar.

(2) Ukoliko Komisija utvrdi da su nedostaci otklonjeni, u Zapisniku koji dostavlja Agenciji predložit će da se izvrši upis u Registar, a ukoliko Komisija utvrdi da i dalje nije izvršeno usklađivanje rješenja o akreditaciji visokoškolske ustanove, odnosno studijskog programa s minimalnim standardima u području visokog obrazovanja i kriterijima za akreditaciju visokoškolskih ustanova, Agencija će po prijemu Zapisnika i prijedloga Komisije, dostaviti Upravnom odboru preporuku o mjerama za usklađivanje rješenja.

(3) Uz Preporuku o mjerama za usklađivanje rješenja o akreditaciji s minimalnim standardima u području visokog obrazovanja i kriterijima za akreditaciju visokoškolskih ustanova Agencija dostavlja Upravnom odboru Izjašnjenje nadležnog tijela o Preporuci Agencije, rješenje o akreditaciji visokoškolske ustanove, odnosno studijskog programa Izvješće Komisije stručnjaka, preporuku Agencije o akreditaciji visokoškolske ustanove, odnosno studijskog programa i zapisnike i prijedloge Komisije iz člana 2. ove instrukcije.

## **Član 7.**

### **(Odluka Upravnog odbora)**

Upravni odbor, u roku od 15 dana od dana prijema Preporuke Agencije, razmatra preporuku i sve druge dokumente iz člana 7. stav (3) ove instrukcije, i u zavisnosti od činjeničnog stanja, cijeneći na isti način sva dokumenta, donosi odluku o mjerama koje nadležna obrazovna tijela trebaju poduzeti za usklađivanje rješenja o akreditaciji s minimalnim standardima u području visokog obrazovanja i kriterijima za akreditaciju visokoškolskih ustanova.

## **Član 8.**

### **(Postupanje nadležnih tijela)**

(1) Odluka Upravnog odbora iz člana 8. ove instrukcije, dostavlja se nadležnom tijelu koje je donijelo rješenje o akreditaciji i Agenciji.

(2) Nadležno tijelo koje je donijelo rješenje o akreditaciji o poduzimanju mjera koje je odredio Upravni odbor i usklađivanju rješenja o akreditaciji s minimalnim standardima u području visokog obrazovanja i kriterijima za akreditaciju visokoškolskih ustanova, u roku koji je određen odlukom Upravnog odbora, obavještava Upravni odbor putem Agencije, dostavljajući i izmijenjeno rješenje o akreditaciji visokoškolske ustanove, odnosno studijskog programa.

(3) Po prijemu obavještenja o poduzimanju mjera koje su određene od Upravnog odbora i, na osnovu toga, donesenog izmijenjenog rješenja o akreditaciji, Upravni odbor donosi odluku da je rješenje o akreditaciji visokoškolske ustanove, odnosno studijskog programa usklađeno s

minimalnim standardima u području visokog obrazovanja i kriterijima za akreditaciju visokoškolskih ustanova, i istu dostavlja nadležnom obrazovnom tijelu putem Agencije, kao i Agenciji, radi upisa u Registar.

(4) Ukoliko nadležno obrazovno tijelo u određenom roku ne obavijesti Upravni odbor o poduzimanju određenih mjera, Upravni odbor će zatražiti pismeno obrazloženje putem Agencije, o nepostupanju nadležnih tijela po odluci Upravnog odbora, i u zavisnosti od obrazloženja nadležnih tijela, odrediti dodatni rok za otklanjanje određenih nedostataka.

(5) Po isteku dodatnog roka, nadležno tijelo koje je donijelo rješenje o akreditaciji, postupit će na način propisan u stavu (2) ovog člana.

(6) Ukoliko nadležno tijelo ne postupi na način propisan u stavu (2) ovog člana ili ukoliko ne poništi rješenje o akreditaciji, o čemu obavještava Upravni odbor i Agenciju, Upravni odbor donosi odluku da rješenje o akreditaciji nije usklađeno s minimalnim standardima u području visokog obrazovanja i kriterijima za akreditaciju visokoškolskih ustanova i da se visokoškolska ustanova, odnosno studijski program ne može upisati u Registar .

(7) Protiv odluke Upravnog odbora iz stava (6) ovog člana, nadležno tijelo koje je donijelo rješenje o akreditaciji, može izjaviti žalbu Upravnom odboru u roku od 15 dana od dana prijema odluke.

(8) O žalbi Upravni odbor odlučuje u skladu sa Zakonom o upravnom postupku Bosne i Hercegovine.

## **Član 9.** **(Primjena Instrukcije)**

Ova Instrukcija stupa na snagu sljedećeg dana od dana donošenja i ista će biti objavljena na web stranici Agencije.

**Broj: 06-02-1-766/11**

Datum: 04.11.2011. godine

**V.D. DIREKTORA**

Boris Ćurković